

Marere Kori'uaina

IOANE

Ererena Hauna

Puka Aona Irerena 'Abina

Marere neiana ena poki hanona rua. Ioane nenuatae a'ikakauma haukia kebarainakia, weiana ia mai Tirama aika Hamaka, mai Nahuna Iesu Keriso ohi kipokia aokia kehamomo. Ibaruana hanona ia a'i nenuatae bai'oi haukia timai ti'oinakia ekia a'ikakauma Tirama herenai hauna katea'i parena. Maearima neiakia ekia hoahoa hanona wapurai temiaho ba na ti'abi aiho, “Hanopaka neiana tabakia hanona a'i tenamo. Iesu hanona Tirama nahuna, ua buonai ia maearimai a'i kemai, hanopaka neiana tabakia kipokia a'i katemiaho haeamo, aika maearima nahababaina 'abana hanona a'i ketai 'apuana.” Haeamona ti'abi, “Maearima ha nenuatae kemiaho harai Tirama herenai raninai, ia hanona hanopaka neiana tabakia a'i keaonamo ainakia, weiakia paukiai aona a'i kearo'ari.”

Marere neiana ererena hanona ba'ioi neiakia aiakia tibahuai haukia nibaki'a tohanakia. Ia ni'abi Iesu hanona emai ia hanona maearima tohana, ba weiakia Iesu tia'ikakaumana haukia hanona Tirama katenuataeai tohana mai maearima abomo kateonamo ainakia.

Puka Paipana Apa'uakia

- a. Roba iahu. (1.1-4)
- b. Ea mai Wapura. (1.5–2.29)
- c. Tirama nahuna mai tiaporo nahuna. (3.1-24)
- d. 'Abi tohana mai beho. (4.1-6)
- e. Raona'au hoana. (4.7-21)
- f. A'ikakauma ena hiabu. (5.1-21)

Mauri 'Abina.

1 ¹Au bariu pou narere benimi hanona hau weiana popouna 'akinai emiaho hauna, weiana hauna haiamaiai taona, mahamaiai taihana, mahamai tohanai taiha haraina mai imamaiai ta'i 'apuana. Ia hanona Mauri 'Abina Keriso weiana mauri pokina hauna. ²Mauri neiana hanopakai ewaira tina. Mauri banaibanai hauna Keriso neiana taihana paunai pouna t̄ahinana t̄airoro aina heremiai. Ia hanona Hamana ohi temiaho ba heremaiai ewaira tina. ³Ai taba taihana abomo 'uruna taona hauna t̄airoro aina heremiai hanona wai mai ai kipokia kahabahaemo. Eka bahaeamo hanona Hamaka mai Nahuna Iesu Keriso aba aika kipokia. ⁴Ai t̄arere benimi ena poki hanona kipokia kahaonamo haeamo.

Tirama Hanona Ea.

⁵Pou Keriso herenai taona hauna bariu t̄airoro aina heremiai hanona neiana. Tirama hanona ea, Ia aonai hanona wapura ha aha'i 'akina. ⁶Aika paha'abi Tirama kipokia nahaba haeamo iamo wapura aonai nahaka'a raninai aika hanona nahabai'oi mai Tirama ena 'abi tohana a'i nahaka'aina. ⁷Ia Tirama ea aonai nemiaho 'abana aika eai nahaka'a raninai aika hanona 'abaka kipokia kahabahaemo, Nahuna Iesu aruarunai eka ki'a ikoikiai neutu obonakia. ⁸Aika paha'abi eka ki'a aha'i raninai aika kipoka nahabapo'onaka abomo Tirama ena 'abi tohana hanona aokai aha'i. ⁹Ia aika eka ki'a Tirama wairanai kahahina pounakia raninai ia hanona aia ibabua 'auna hauna mai bero hauna ba eka ki'a kehina haonakia abomo eka beho ikoikiai ketutu obonakia. ¹⁰Aika paha'abi ki'a ha a'i hababaina raninai Tirama hanona bai'oi haunai nahabaona, abomo ena 'abi hanona aokai aha'i 'akina.

Keriso Hanona Aika Ibaraika Hauna.

2 ¹Naha'u ki'ami e, au neiana narerena niwahi heremi hanona wai ki'a ha a'i katobabaina paunai. Ia hau ha ki'a nibabaina raninai aika ibaraika hauna ha nemiaho Hamana kehina bena aika paukai, ia hanona bero hauna Iesu Keriso. ²Ia kipona ena mauri ebaibeni bairarao tabanai eao eka ki'a ihina haona paunai, aika ikupaiaaka mo paukai aha'i ia maearima ikoinai^a ekia ki'a paunai.

³Aika Tirama ehina benaka 'abikia nahaka'a ainakia raninai kaha'ioibina aika hanona Tirama ha'ioibina.

⁴Hau ha pe'abi petibaha, "Au Tirama a'ioibina," ia Tirama ena rauhuhu a'i nika'ainakia raninai, hau weiana hanona bai'oi hauna, ia aonai

^a 2.2 'ao *hanopaka maikoinai*

Tirama ena 'abi tohana hanona a'i nemiaho. ⁵Hau ha Tirama ena 'abi nika'ainakia hauna hanona Tirama niraona'auai^b tohana. Weianai kaha'iohi haraina aika hanona Tirama herenai nahamiaho. ⁶Hau ha ni'abi ia Tirama herenai nemiaho hauna hanona Iesu emauriaina maurina ihobonai kemaui.

Rauhubu 'Abina Mahamahana.

⁷E'u hau ki'ami e, rauhubu 'abina neiana narerena niwahi hauna hanona mahamahana aha'i, ia rauhubu 'abina 'ai'aina aba 'uainai toa'ikakauma aonai toa'ina, rauhubu 'abina 'ai'aina neiana hanona aba to'ona 'abina. ⁸Iamo rauhubu 'abina neiana hanona mahamahana, anina tohana hanona Keriso mai wai heremiai aba nahaihana, pokina wapura hanona aba nikapare, ea tohana aba nirara.

⁹Hau ha ni'abi ia hanona ea aonai nemiaho, iamo uaho'abana 'arina a'i ni'ari hauna hanona bariu wapura aonai nemiaho ohomo. ¹⁰Hau ha uaho'abana niraona'au aina hanona ea aonai nemiaho, ba herenai ki'a aha'i, hau ha a'i kebabehona. ¹¹Ia hau ha uaho'abana 'arina a'i ni'ari hauna hanona wapura aonai nemiaho mai wapura aonai nika'a. Wapura ehore ia mahana aba ekaiabunakia buonai, aeana niao hanona a'i ne'iohina.

¹²Naha'u ki'ami e,
narere benimi ena poki hanona
emi ki'a Keriso atanai
aba ihina hao.

¹³Hamamai haumi e,
narere benimi ena poki hanona
wai hau weiana popounai
emiaho emai mo bariu hauna
aba to'iohina.
Hau 'aru'arumi e,
narere benimi ena poki hanona
wai hau ki'a obona aba
toba'ehona.

¹⁴Naha'u e,
narere benimi ena poki hanona
wai Hamaka to'iohina.
Hamamai haumi e,
narere benimi ena poki hanona
wai hau weiana popounai
emiaho emaimo bariu hauna

^b 2.5 'ao *Tirama ena raona'au ia aonai*

aba to'iohina.
 Hau 'aru'arumi e,
 narere benimi ena poki hanona
 tutabura Tirama ena 'abi
 wai aomia nemiaho ba
 hau ki'a obona aba toba'ehona.

¹⁵Hanopaka mai aonai temiaho tabakia ikoinai a'i katoraona'au ainakia, iamo hau ha hanopaka niraona'au aina raninai, ia hanona Hamaka a'i niraona'auai tohana. ¹⁶Pokina hanopaka aona tabakia ikoikiai hanona hauani ena nuatae ki'a tabakia katebabai, maha ena nuatae ki'a tabakia kateiha, mai obia tabakia kateapainakia, uahomakia ikoikiai hanona Hamaka herenai a'i timai ia hanopaka herenai timai. ¹⁷Hanopaka mai aona inuatae aina tabakia ikoikiai aba ti'akauma ore, ia Tirama ena nuatae akana tibabaina haukia hanona katemaui banaibanai.

Keriso Ena 'Ou Hauna.

¹⁸Naha'u e, hanopaka kepua ranina hanona aba ekara'au. Pou aba tona Keriso ena 'ou hauna nimai, ia bariu Keriso ena 'ou haukia bo'okia hanona aba tewaira tina. Ua buonai aika ha'iohina rani puana hanona aba ekara'au. ¹⁹Maearima weiakia hanona herekai tekarahi pokina ia hanona aika 'abaka tohakia aha'i. Ia aika 'abaka haukia raninai, aika kipokia pahamiaho haemo. Iamo ekia ka'a oboai kaha'iohi haraina ia hanona aika 'abaka aha'i.

²⁰Ia wai hanona Auba Robe weiana Robe hauna Keriso ebaibeni hauna aba toa'ina aomia, ua buonai wai ikoimiai Tirama ena 'abi tohana to'iohina.^c ²¹Au wai narere benimi hanona Tirama ena 'abi tohana a'i to'iohina paunai aha'i, ia wai hanona Tirama ena 'abi tohana aba to'iohina. Ba wai aba to'iohina bai'oi hanona Tirama ena 'abi tohana herenai a'i nimai. ²²Bai'oi hauna hanona tai? Ia hauna ni'abi Iesu hanona Keriso aha'i. Maearima uahomana hanona Keriso ena 'ou hauna, ia hanona Hama mai Nahu ohi nebuniainakia. ²³Hau ha Nahu nebuniaina hauna hanona ia herenai Hama aha'i. Hau ha Nahu nibatohana hauna hanona Hama abomo ia herenai.

²⁴Popounai 'abi tona hauna hanona aomia kemiaho. Tona 'abina weiana katoka'aina raninai, wai hanona Nahuna aonai mai Hamana aonai katomiaho. ²⁵Neiana hanona Keriso kipona e'abi'uai aika 'euka, mauri banaibanai kebenaka.

²⁶Narere benimi weiakia ekia nuatae kate'oinimi haukia robakia ahuna. ²⁷Ia wai hanona Keriso ehore Auba Robe ebenimi aomia

^c 2.20 'ao wai Tirama ena 'abi tohana ikoinai to'iohina.

nemiaho, ua buonai maearima ha a'i keba 'iobinimi re'a abetaina. Pokina Auba Robe hanona taba ikoinai niba'iobinimi, ena ba'iobi hanona tohaka, ia a'i nibai'oi. Auba Robe eba'iobinimi ihobonai rani ikoinai Keriso aonai katomiaho.

²⁸Naha'u ki'ami e, bariu Keriso aonai katomiaho, pokina ia ena mue mai raninai aika hanona kahatabura abomo a'i kahahaumaea ia wairanai. ²⁹Wai to'jobina Keriso hanona bero hauna raninai, kato'iobi haraina maearima weiakia bero akakia tibabai haukia ikoikiai hanona Tirama nahuna.

Tirama Nahunai Nahaeao Hauka.

3 ¹Hamaraona harai, Hamaka ena raona'au herekai eapa'ua ki'a baha ba eaparinaka aika hanona Tirama nahuna. Aika hanona ia nahuna tohaka. Hanopaka haukia a'i te'iobinaka ena poki hanona ia Tirama a'i te'jobina paunai. ²E'u hau ki'ami e, bariu aika hanona Tirama nahuna, ia aika maearima aehomaka hanona a'i niwaira tina harai baha, iamo aika ha'jobina Keriso kewaira tina raninai^d aika hanona ia 'abanai kahaeao, pokina ia tohana kahaihana. ³Maearima ikoinai Keriso herenai buabeni neianai temiaho haukia hanona kipokia aokia ki'a keaha'i ihobona Keriso aona ki'a eaha'i 'abana.

⁴Hau ha ki'a nibabaina hanona Tirama ena rauhuhu ni'oatana, pokina ki'a hanona rauhuhu ni'oatana. ⁵Ia wai aba to'jobina Keriso ewaira tina hanona ki'a kea'i pare, ia aonai hanona ki'a ha aha'i. ⁶Ua buonai hau ha Keriso ohi temiaho oioi hauna hanona ki'a a'i nibabai to'ona. Ia hau ha ki'a nibabai to'ona hauna hanona Keriso a'i eiha tinana abomo a'i e'jobina.

⁷Naha'u ki'ami e, hau ha beho babai 'ekakiai a'i meaoainimi. Hau ha aka berona nibabaina hauna hanona ebero, ihobona Keriso ebero 'abana. ⁸Ki'a nibabai to'ona hauna hanona Tiaporo 'euna, pokina Tiaporo hanona aba popounai ki'a ebabaina emai mo bariu. Tirama nahuna ewaira tina ena poki hanona neiana, Tiaporo ena aka kebabururuna. ⁹Hau ha Tirama nahunai niao hauna hanona ki'a a'i nibabai to'ona, pokina mauri mahamahana weiana Tirama herenai emai hauna ia aonai nemiaho. Ia Tirama 'eunai erama paunai ki'a a'i kebabai to'ona. ¹⁰Weiana Tirama nahuna mai Tiaporo nahuna baiatakia kaha'iobi haraina. Hau ha aka berona a'i nibabaina 'ao uaho'abana a'i niraona'au aina hanona Tirama nahuna aha'i.

Aika Ha Ha Kaharaona'au ainaka.

¹¹'Uainai toa'ikakauma aonai pou tona hauna neiana: Aika ha ha kaha raona'au ainaka. ¹²Kaino 'abanai a'i katoao, ia hanona Tiaporo ena

^d 3.2 'ao ua kehoma raninai

maearima, kipona hatina Abela eahu 'arina. Taba buonai Kaino Abela eahu 'arina? Pokina ia ena hoahoa hanona teki'a, ia hatina ena hoahoa hanona tebero.

¹³Uaho'aba'u e, hanopaka haukia 'arimi a'i kate'ari re'a, a'i katota'u ta'u huri. ¹⁴Aika uaho'abaka naharaona'au ainakia paunai ha'iohina aika hanona 'ari aonai aba hakarahi mauri mahamahana aonai hatoto. Ia hau ha ena raona'au aha'i hauna hanona 'ari aonai nemiaho ohomo. ¹⁵Uaho'abana 'arina a'i ni'ari hauna hanona ahuaahu hauna, wai to'iohina ahuaahu hauna aonai hanona mauri banaibanai a'i nemiaho. ¹⁶Keriso ena mauri ebaibeni aika paukai. Neianai aika raona'au tohana hanona taba ha'iohina. Ua buonai aika abomo eka mauri kahabaibeni uaho'abaka paukiai. ¹⁷Herenai taba tebo'o hauna uaho'abana neuraru hauna neihana iamo a'i nibaraina raninai, ha'iohina Tirama ena raona'au hanona ia aonai a'i nemiaho. ¹⁸Naha'u ki'ami e, eka raona'au hanona 'abiai mo mai pinakai mo a'i kahahina 'abaeana, ia eka raona'au hanona eka hoahoa tohanai kahabaiha baiha aina.

Kahanuako'o Tirama Wairanai.

¹⁹Taeara neianai kaha'iohina aika hanona Tirama ena 'abi tohana kipokia nahamiaho, haeamona aoka ketabura Tirama wairanai. ²⁰Aoka kehinabe ki'anaka re'a, aika ha'iohina Tirama hanona epa'ua ki'a baha ba aika aoka mai ha'iohi tabakia maikoina, abomo ia hanona taba ikoikiai ne'iohinakia. ²¹E'u hau ki'ami e, aika aoka a'i kehinabe ki'anaka raninai aika mai taburaka Tirama wairanai kahakoroti. ²²Ba herenai taba ikoinai kahanoi haukia kebenaka, pokina ena rauhuhu 'abina nahaka'aina mai ibaonamona akana nahababaina. ²³Tirama ena rauhuhu 'abina hanona neiana, aika Ia Nahuna Iesu Keriso atana kaha'ikakaumana mai ehina benaka 'abana, ha ha kaharaona'au ainaka. ²⁴Tirama ena rauhuhu 'abina nika'aina hauna hanona Tirama aonai nemiaho, Tirama abomo ia aonai nemiaho. Tirama Auba Robe ebenaka paunai, aika ha'iohina Tirama hanona aika aokai.

Tirama Aubana Mai Auba Ki'a Obona.

4 ¹E'u hau ki'ami e, Auba Robe tea'ina na tiho haukia ikoikiai ekia 'abi a'i katoba tohanakia, ia katohobo 'uainakia kato'iohina auba weiana hanona Tirama herenai emai 'ao. Pokina mahabanai haukia bai'iohia bo'okia hanopakai aba tewaira tina 'eka maikoinai. ²A wai Tirama ena Auba Robe ea'ina hauna hanona taeara neianai ko'iohina: Hau ha kehina pouna Iesu Keriso hanona hauaniai emai hanopakai raninai, auba weiana ia ea'ina hauna hanona Tirama herenai emai. ³Ia auba ha Iesu nebuniaina hanona Tirama herenai a'i emai. Auba weiana hanona Keriso ena 'ou hauna Tiaporo herenai emai. Pouna tona kemai ia aba emai bariu hanopaka neiana aonai.

⁴Naha'u ki'ami e, wai hanona Tirama 'euna, mahabanai haukia bai'oikia toba'ehonakia, pokina Tirama ena Auba aomia nemiaho hauna etabura ki'a baha ba tiaporo weiana hanopaka haukia herekiai. ⁵Ia mahabanai bai'oikia hanona hanopaka 'euna, ua buonai hanopaka 'abikia mo tehinanakia hanopaka haukia ia aiakia tiona. ⁶Ia aika hanona Tirama 'euna, hau ha Tirama e'jobina hauna hanona aiaka keona, ia hau ha Tirama 'euna aha'i hauna hanona aiaka a'i keona. Ihaiha nahomanai 'abi tohana aubana mai bai'oi aubana hanona aba kaha'ioi ainakia.

Tirama Hanona Raona'au.

⁷E'u hau ki'ami e, ha ha hamaraona'au ainaka, pokina raona'au hanona Tirama herenai emai. Niraona'au hauna hanona Tirama nahunai niao, abomo Tirama ne'jobina. ⁸'A a'i niraona'au hauna hanona Tirama a'i e'jobina, pokina Tirama hanona raona'au. ⁹Tirama hanona ena raona'au na ebaiha aihonaka, Nahuna hamo hamona euhuna emai hanopakai, weiana ia paunai aika kahamauri. ¹⁰Raona'au tohana hanona neiana: Aika Tirama a'i haraona'au aina, ia Tirama aika eraona'au ainaka paunai Nahuna euhuna emai aika eka ki'a ihina haona tabanai eao.

¹¹E'u hau ki'ami e, Tirama hanona na eraona'au aihonaka buonai, aika abomo 'abaka ha ha ua kaharaona'au aihonakia. ¹²Hau ha Tirama a'i eiha 'apuana, iamo aika 'abaka ha ha kaharaona'au ainakia raninai, Tirama hanona aika aokai nemiaho, ena raona'au hanona aba nitabura 'au aika aokai.

¹³Tirama Auba Robe ebenaka buonai, ha'jobina aika hanona Tirama aonai nahamiaho haeamona ia abomo aika aokai nemiaho. ¹⁴Tirama Nahuna euhuna emai hanopakai maearima ibamaurikia haunai eao, weiana ai aba taihana mai tahina pouna. ¹⁵Hau ha ena 'abiai keba tohana Iesu hanona Tirama Nahuna raninai, Tirama hanona ia aonai nemiaho, ia abomo Tirama aonai nemiaho. ¹⁶Tirama niraona'au ainaka hauna ha'jobina mai naha'ikakaumana.

'Abi tohana Tirama hanona raona'au. Hau ha maearima niraona'au aina hauna hanona Tirama aonai nemiaho, Tirama abomo ia aonai nemiaho. ¹⁷Taeara neianai raona'au aokai aba nitabura 'au, ba weianai aika hanona a'i kahata'u Tirama ena bakai wapuna aonai, pokina hanopaka neiana aonai eka mauri hanona Keriso ena mauri ihobona. ¹⁸Tirama ena raona'au aonai hanona a'i kahata'u, Tirama ena raona'au taburana hanona ta'u maikoina neu'u ahinakia, pokina ta'u aonai puma raonana nemiaho. Ua buonai hau ha nita'u hanona ia aonai raona'au a'i nitabura harai baha.

¹⁹Aika ha ha 'abaka naharaona'au ainakia pokina Tirama aika eraona'auai 'uainaka paunai. ²⁰Hau ha ni'abi ia Tirama niraona'au aina iamo uaho'abana 'arina a'i ni'ari raninai, ia hanona bai'oi hauna. Hau

ha uaho'abana nahaihana hauna a'i niraona'au aina hanona Tirama a'i nahaihana hauna keraona'au aina a'i ketaina. ²¹Keriso rauhuhu 'abina ebenaka hauna neiana: Tirama niraona'au aina hauna hanona uaho'abana abomo keraona'au aina.

A'ikakauma Haukia Hanopaka Ena Hoahoa Tiba'ehonakia.

5 ¹Maearima weiana Iesu hanona Keriso nia'ikakaumana hauna hanona Tirama nahuna, Hama niraona'au aina hauna hanona nahuna abomo niraona'au ainakia. ²Tirama naharaona'au aina mai ena rauhuhu 'abikia nahaka'a ainakia raninai, neianai kaha'ioi haraina aika hanona Tirama nahuna naharaona'au ainakia. ³Aika Tirama naharaona'au aina hanona ena rauhuhu 'abikia kahaka'a ainakia. Abomo ena rauhuhu 'abikia hanona a'i tepahihi aika herekai. ⁴Pokina Tirama nahuna ikoinai hanona hanopaka hiabuna tiba'ehona. Aika Tirama naha'ikakaumana, hoahoa neianai hanopaka ena hiabu nahaba'ehona. ⁵Ua buonai hanopaka hiabuna tiba'ehona haukia hanona weiakia tia'ikakauma Iesu hanona Tirama Nahuna haukia mo ikupaiaikia.

Tirama Ehore Nahuna Pouna Ehinana.

⁶Iesu Keriso hanona beiai mai aruaruai emai, beiai e'uere robe mai matiu ibiri ropo 'arunai e'ari. Ia hanona beiai mo a'i emai, ia beiai mai aruaruai emai. Auba Robe abomo nibatohana, pokina Auba Robe hanona Tirama ena 'abi tohana. ⁷Ua buonai teaihau hanona Iesu tibatohana: ⁸Auba Robe, bei, mai aruaru,^e teaihau ekia 'abi hanona hamona, Iesu hanona Tirama Nahuna.

⁹Aika maearima tebatohana 'abina naha'i taeanakia, ia Tirama ebatohana 'abina hanona epa'ua ki'a baha pokina ia hanona Tirama, ebatohana 'abina hanona ia Nahuna pouna. ¹⁰Maearima ha Tirama Nahuna nia'ikakaumana hauna hanona batoha 'abina neiana ia aonai nemiaho. Tirama a'i nia'ikakaumana hauna hanona Tirama bai'oi haunai nibaona, pokina maearima weiana hanona Tirama ebatohana 'abina Nahuna herenai e'uahina hauna a'i nia'ikakaumana. ¹¹Tirama ebatohana 'abina hanona neiana: Tirama hanona mauri banaibanai ebenaka, ba mauri neiana hanona Nahuna Iesu Keriso aonai nemiaho. ¹²Tirama Nahuna ea'ina hauna hanona mauri aba ea'ina, 'a Tirama Nahuna a'i ea'ina hauna hanona mauri a'i ea'ina.

Mauri Banaibanai.

¹³Tirama Nahuna atana tua'ikakaumana haumi marere neiana narere benimi, pokina wai kato'ioibina mauri banaibanai hanona aba toa'ina.

^e 5.8 *baika te'abi, Hamana mai 'abi tohana mai Auba Robe teaihau*

¹⁴Aika hanona tabura neiana ha'ina Tirama wairanai, aika ia ena nuatae ihobonai kahanoina raninai aiaka niona. ¹⁵Aika ha'jobina Tirama herenai taba taba kahanoi ainakia hanona aiaka niona raninai, ha'jobi haraina hanoiai tabakia hanona aba ha'inakia.

¹⁶Hau ha uaho'abana herenai ki'a weiana a'i keba'ari baihana hauna neihana raninai ahanai kehabuba'ari, ba Tirama kehore uaho'abana weiana mauri kebena. Au maearima weiakia ekia ki'a a'i keaoainakia 'ari 'ekana hauna na'uahina. Ia maearima baika ki'a ha tibabaina weiana keaoainakia 'ari 'ekana. Au ki'a weiana ahanai kehabuba'ari hauna robana a'i nahuna. ¹⁷Beho babai ikoinai hanona ki'a, ia ki'a baika hanona a'i tiaoinaka 'ari banaibanai 'ekana.

¹⁸Aika ha'jobina Tirama nahunai tiao haukia hanona ki'a a'i tibabai to'ona. Tirama Nahuna ni'aeabunakia, hau ki'a obona ia a'i kea'i 'apuanakia. ¹⁹Ha'jobina aika hanona Tirama nahuna, ia hanopaka maikoina hanona hau ki'a obona ena hiabu aonai.

²⁰Abomo aika ha'jobina Tirama Nahuna emai hanona aoka ebaeana, weianai aika Tirama tohana kaha'jobina, haeamona aika hanona Tirama tohana aonai mai Nahuna Iesu Keriso aonai nahamiaho. Iesu Keriso hanona Tirama tohana abomo ia hanona mauri banaibanai pokina.

²¹Naha'u ki'ami e, bai'oi tiramakia herekiai kato'ima 'ima harainimi herekiai katokapare.